

■ PRO FILIA EN IL GRISCHUN 2014

La situaziun finanziaria è precara

(anr) La Pro Filia, fundada 1896, è in'organisaziun svizra che gida giuvnas en dumondas da scolaziun, professiun e vita. Deplorablmain sa chatta la Pro Filia en il Grischun – suenter che las contribuziuns da chantun e da la citad da Cuira èn crudadas davent – en ina zunt precara situaziun finanziaria. Già per la segunda giada serra il quint cun ina auta perdita. Per 2014 hai dà in deficit da passa 10 000 francs che reducescha massivamain l'agen chapital (facultad).

Sche las dumondas per sustegn finanziel a persunas privatas, firmas u fundaziuns na portan nagut saja la Pro Filia sfurzada da dar si ses biro. Ins ha dentant anc adina la speranza d'als chat-tar. Mo tras las contribuziuns dals com-members, fautors, l'ordinariat e pliras plaivs pon ins cuntinuar cun la purschida. Siond che l'agid da las dunnas evangelicas è vegnì schlià ha la Pro Filia sur-

vegnì 1000 francs or da la facultad re-partgida.

Intermediaziun dad au-pair

L'onn passà èn ils piazzaments dad au-pair sa reducids levamain. Ils blers vulessan vegnir piazzads tar famiglias englaisas. L'offerta è dentant pitschna. Percunter è la dumonda dad au-pair en il Grischun gronda, oravant tut sin la champagna. Tuttas famiglias na pon betg vegnir resguardadas, siond ch'ils giuvenils prefereschan las citads. Ils piazzaments sa fan adina a pli curt termin. Malgrà ils quitads finanziarials sa dattan ins fadia da porscher vivanant ina buna cussegliaziun e tgira.

L'onn social grischun

15 giuvenilas ed in giuvenil han entschavì il fanadur l'onn social da transiziun en il Palottis ad Aschera. Durant tschintg emnas èn ils absolvents vegnids prepa-

rads sin il praticum en famiglias. En plirs spitals, chasas d'attempads ed impedids sco er en canortas d'uffants han els passentà lur praticum final durant 17 emnas. Il diplom han 14 absolventas cuntanschi e tuttas han survegnì in plaz d'emprendissadi u praticum.

Casa Florentini – sut nova direcziun

La Casa Florentini è in abitadi per giuvenilas e giuvenils amez la citad da Cuira cun stanzas singulas u da dus. La chasa è bain endrizzada e fitg tschertgada. Tar la direcziun hai dà ina midada l'entschatta da l'onn. La nova manadra *Karin Federspiel-Züst* ha instradà diversas restructuraziuns e midadas. Cun cleras reglas ed avertamain vulan ins ademplir ils giavischs dals cussadents cun procurar en chasa per ina buna atmosfera da dimora.